

## Vorrede.

leidige Teuffel/vnter solchē vnd derglei-  
chē politicis consiliis, welche wo statt  
vnd raum gegeben wird/kein irthum so  
groß/kein verführung so schrecklich sein  
vnd entstehen wird/welche man getrost  
wird verwerffen vnd verdammen dörfen  
oder kōnne/ursach/die politici berichte/  
solche sein im H. Röm. Reich noch nie  
verdampft/vnd möchte hieraus allerley  
vnfried vnd vnrub erwachsen.

Vñ dieser Politische Klug: vnd weis-  
heit habē weder Christus/noch die Apo-  
stel/noch andere fromme Bischoffe vnd  
Lehrer der kirchē Gottes/von der lieben  
Apostel zeit an/bis auff diesen heutigen  
tag/nit dz geringste gewust/vielweniger  
solchen Politische Calvinischen rath in  
acht genomēn. Sonstē würde Christus  
die Phariseer/Saduceer/Schriffte-  
lertē nit mit namē genennet:vor derselbē  
verführischen sawerteig seine schäfflein  
nit gewarnet: Ja derselben falsche Lehr  
nit verworffen vnd verdammet habē: So  
würde auch d. H. apostel Paulus dē fal-  
sche Aposteln/It. Hymeneo vñ Philetos:  
noch